

ANG MAGSASABWAG

Volume 1, Issue 1

Ang mga Detalye sa sulod

Kalihukan sa Davao

• Mensahe sa SM Elder

Spirit and Truth Fellowship of Asia, Inc.

Mga Sulod nga Taho:	1
DLF STFA	2
Testimony sa Kadaogan Cotabato STFA	3
Cebulan STFA Lapuan STFA Nueva Villa STFA	4
Pagsimba Pagtolon-an Kabatan-onan	5
Litiral ba ang Juan 14:1-2? Lisod nga sitas	6
Unsa ang Spirit and Truth? Mga Pahibalo	7

KALIHUKAN SA STFA DAVAO

Ni: Bro. Willie B. Matub

Pagkadalaygon sa atong makagagahum nga Dios ug Amahan sa atong Ginoong Jesu-Kristo sa ilang pagpanalangin sa unang panaghiusa sa mga Fellowships sa STFA sa interchurch Bread Breaking service nga nahigayon atong Septembre 7, 2008 didto sa STFA Diversion Road, Bangkal, Ciudad sa Davao.

Ang maong kalihukan giduyugan sa mga kaigsuonan gikan sa DLF Village, Dacoville, Mintal, Matina Aplaya, pipila ka mga kaigsuonan gikan sa Cebulan Fellowship. Ang mga kalihukan naglakip sa mainitong panagawit (Praise & Worsship) gidumala ni Hanna Penas ug

mainitong pasalamat sa madaugong mga kaigsuonan. Si Igsuong Roger Dao maoy nanguna sa maong buluhaton ingon nga host sa Bangkal Fellowship. Si Igsuong Ben Kiamco III nangulo sa mga kaigsuonan gikan sa DLF maoy mibasa sa mensaheng texto. Si Engr. Dodong Panganpan nga maoy bisita niadtong higayona mipahat sa iyang kasinatian sa unang pagkakaplag niya sa kamatuoran, midasig sa mga kaigsuonan kung unsa ang iyang mga pag-antos sa dihang una siyang midawat sa kamatuoran. Tanang mga kaigsuonan nagdala sa ilang mga paniudto ug malipayong nakigsalo sa tanan nga mitambong sa maong kalihukan sa



STFA sa Bangkal, ciudad sa Davao. Kining inyong ubos nga higala maoy mibahin sa pulong sa Dios. Sa maong panagtigum napamatud-an diha sa mga pulong sa Dios-nga naga-ingon “Pagkamaayo ug pagkamalipayon gayod sa mga magsuon nga managpuyo sa panaghiusa” **Salmo 133:1.**

MENSAHE GIKAN SA STFA SOUTHMIN ELDER

Ni: Bro. Willie Matub

Sulod sa pipila ka mga katui-kan karon pa lamang natuman ang dugay na nga tinguha nga makahimo ang Southern Mindanao STFA ug usa ka newsletter kon Sulat Balita bahin sa daghang mga

kalihokan sa kaiglesiahan sa tibuok STFA Southern Mindanao. Dako usab nako nga kalipay sa mga kaigsoonan nga mitampo sa ilang mga hunahuna ug mga articles nga maoy sulod niining maong newsletter. Ang pagkahibalo bahin sa mga Iglesia ug sa

ilang mga buluhaton sa ilang nagkadiyang mga dapit makapadasisig sa uban ug makapasamot sa ilang hugot nga pagpangalagad sa atong bugtong matuod nga Dios ug sa iyang pinalanggang Anak ang atong Ginoong Jesu-Cristo nga manluluwas.

NAGPADAYON NGA BULUHATON SA DLF

Adunay kalipayan sa matag buluhaton nga gitugyan sa Dios kanato. Ang matag usa makadawat sa Ganti sibo sa imong nabuhat.

Ni Ben R. Kiamco III

Dinhi sa DLF Village nagsugod ang buluhaton sa Dios inabagan sa Spirit & Truth Fellowship of Asia, Inc. niadtong Mayo 8, 2008 human sa panagsabot sa STFA Bangkal. Sa DLF nagapadayon ang kalihukan sama sa panagtigum alang sa mga pagampo matag Merkules sa gabii. Ang ubang kalihukan matag Lunes ug Bernis mao ang mga pagtuon sa Biblia sa matag panimalay nga naka schedule aron

masangkapan ang mga pamilya sa pulong sa Dios sumala sa **II Timoteo 2:2**.

Bulan sa Septembre adunay nahitabo nga hinugpong nga panagtigum sa tulo ka Iglesia nga naglangkob sa Cebulan, Bangkal ug DLF ug malipayon ang usag-usa sa panagsandurotay uban sa pagpangaon ug panaghimamatay sa usag-usa. Kini nga kalihukan nagpahinumdom kanako sa gibuhay sa unang mga magtutuo nga nahisulat sa Mga

Buhat 2:44-46. “ug nag-ipon ang tanang nanagpanuo ug ilang gipanag-usahan sa pag-ambit ang tanang mga butang, ug gipamaligya ang ilang kabtangan, ug ang halin ilang gibahinbahin sa tanan, sumala sa kinahanglanon ni bisan kinsa. Ug sa adlaw adlaw sila nanagpanadayon sa panaghiusa didto sa templo, ug sa pagpikaspikas sa tinapay sa ilang kabalayan, ug sa pagpangaon dinoyogan sa kasadya ug kayano sa kasingkasing”.

Publisher:

Spirit and Truth

Fellowship of Asia, Inc.

Chief Editor:

Willie B. Matub

**Southern Mindanao
Area Newsletter.**

MGA TESTIMONYO SA KADAOGAN

Ni Jesie Pame

Hallelujah! Mapasalamaton gayod ako og dako sa atong buhi nga Diyos ug sa iyang anak nga si Jesu-kristo nga atong manluluwas kay pagkahuman sa pila katuig nga pag-antos og sa katapusan ako nakagradwar sa kolehiyo luyo sa mga kalisdanan sa kinabuhi siya nagpaluyo, na-

gagiya, og nagaproteksyon kanako. Ug dili lang kana akong kadaogan karon nga tuig, sa niaging septembre 13-14, 2008, ako nakapasar sa among board examination sa electrical engineering. Kini nga mga kadaogan dili gayod nako ni maangkon kung pinaagi lamang sa akong kaugalingong kaalam ug kusog. Madaugon ako tungod sa iyang

grasya, gugma, ug kalooy. Mapasalamaton gayod ako sa tanan niyang tabang ug ginabuhay sa akong kinabuhi. Wala gayod niya gipakyas ang akong mga hangyo ug pangamuyo sa kinabuhi. Busa kita mga kaigsoonan diha kang Kristo, magmaalampuon gayod kita, ug atong isalig ang tanan sa atong Dios nga labing gamhanan.

Cotabato nga mga Kaigsoonan

Ni. Bro. Florentino Aguan

Human sa daghang mga pagtayo og sa buluhaton dinhi sa Kabacan, Cotabato ninghulpa ra gyod ang unos sa mga pagdagsal. Sayo niining tuiga pipila ka mga kaigsoonan ang mikalas o mihawa sa STFA tungod sa kalahian sa pagtolon-an ug sis-

tema sa pagdumala. Akong giisip nga kadtong mihawa nga kaigsoonan dili makadawat sa lawom ug gahi apan tiunay nga kamatooran sa pulong sa Dios. Akong namatikdan nga ang lider sa misipak nga mga kaigsoonan adunay sahi nga katuyoan sa iyang pagpakig-

uban kanamo sa pipila ka mga katuigan. Apan wala namo tugoti nga mulampos siya ug mihawa ra gayod. Mga kaigsoonan sa Carmen mibalik pag-usab sa ilang pakig-uban kanato ug dako nakung kalipay ang ilang mainiton nga pagdawat ug paghibalik.



Ang Kabacan ug Carmen, Cotabato anaa sa pagdumala ni Igsoong Florentino Aguan.

Mga Kaigsoonan sa Cebulan

Ni Gil T. Estrella

Sugod sa 2002 sa paghisulod ni Igsoong Ben Kiamco sa STFA nga kanhi gitawag nga Christian Educational Services, ang buluhaton sa Cebulan daw wa pa gyod matigayon. Niadtong milabay'ng tuig sa akong pagsulod niini nga grupo ang balay tigumanan wala pa usab maareglar sanglit kapos man sa panalapi ang panudlanan. Apan sa hamubo nga pagdumala ni Igsoong Winnie Manco ug sa pag-

ayuda ni Brother Ben Kiamco ug mga kaigsoonan, nakasugod kami sa pagrepair sa gamay'ng tigumanan uban sa panabang sa atong maloloy-on nga Dios nga Amahan sa atong Ginoong Jesu-Kristo. Adunay dyotay'ng kakulangon sa mga materialis apan nagtoo kami uban sa inyong mga pag-ampo makompleto ang tanan. Ang kahimtang sa pagdumala sa STFA Cebulan nag-atubang ug usa ka hagit nga sa akong panlantaw sa tabang sa Dios malatasan sanglit naghug-

pong ang mga kaigsoonan aron sa hiniusang kusog kahatagan ug maayong direksyon ang buluhaton nga gisangon sa Dios kanamong tanan dinhi sa Cebulan. Padayon usab ang pagtoon sa pulong sa Dios ilabi na sa mga pagtolon-an nga tulogkaron pa aron nga mahingpit ang panaghiusa. Sa sulat ni san-Pablo kang Timoteo “..bantayi pag-ayo ang imong kaugalingon ug ang imong pagpanudlo, magpadayon ikaw niini...” I Timoteo 4:16.



Ang Maayong balita gikan sa halayo makalipay sa kasingkasing.

ANG TIGUMANAN SA LAPUAN

Ni Eliceo Angus

Human sa tulo ka mga katuigan ang milabay, ang among gamay'ng tigumanan sa Inulasan, Lapuan, Don Marcelino, Davao del Sur, nagsugod na sa pagkadaut ug kung moulán isig pamalhin ang mga kaigsoonan aron makasilong. Niadtong Setembre 17, niining tuiga ang

mga kaigsoonan sa Kabacan nga pinangulohan ni Igsoong Florentino Aguan ug sa saad ni Igsoong Willie Matub naatopan ang among tigumanan. Dako namong pasalamat uban sa tanang mga kaigsoonan sa Lapuan nga komportablí na pagbalik ang among tigumanan. Ang panagtigum dinhi sa

Lapuan miabot na sa tulo ka mga katuigan ug malipayon namong gipahibalo nga Karong **Novembre 28, 2008** maoy among ikatulo nga anibersaryo sukad natukod ang buluhaton sa Dios dinhi nga dapit, sa Lapuan, Don Marcelino ug hinaut nga magkita kita sa maong panagtigum.

Staff Writers:

Ben Kiamco III
Jesie Pame
Rogelio Dao
Arnold Matub
Florentino Aguan
Gil T. Estrella
Elecio Angus

MGA KAIGSOONAN SA NUEVA VILLA NABASKOG PAG-USAB

Niadtong katapusan sa milabay'ng bulan si Igsoong Arnold Matub nakabalik pag-usab sa Nueva Villa, Don Marcelino, Davao del Sur ug mibalita sa dakong kalipay sa mga kaigsoonan didto human nga nakakita ug migamit sa galamiton sa panimbahon didto. Si Ig-

soong Arnold nakapalit ug tuloggon nga duha ka speaker ug mikropono nga maoy magamit sa mga kaigsoonan didto matag adlaw'ng Domingo. Matod ni Arnold si Igsoong Makel Gorio ug Waldner Bautista naghinamhinam sa paggamit niini ug nakalipay ang matag-usa sanglit

duna nama'y magamit matag tigum sa mga kaigsoonan ilabi na nga nagsingabot na ang bulan sa Desyembre nga maoy tinuig nga pagpasalamat sa mga Kaigsoonan dinhi nga dapit.

Reported By: Arnold Matub



Walay kabutangan sa among kalipay diha sa pag-alagad sa Dios.

Pagsimba sa matuod nga Dios



Kitang tanang may kinabuhi kinahanglan mosimba sa Dios.

Ni: Willie B. Matub

Sa sinugdanan ang Dios ginasisimba sa mga Anghel, **Job 38:1-7**. apan sa dihang nahimo na sa Dios ang tawo, gusto sa Dios nga ang iyang katawhan mosimba kaniya ug modayeg kaniya. Si Jesus mihimo ug pahayag niini labot sa hisgutang pagsimba. **Juan 4:23-24**.

“Ang takna taliabot ug karon mao na, nga ang tinuod nga magsisimba sa Amahan diha sa espiritu ug sa kamatuoran, kay

kini mao ang ginapangita sa Amahan nga maoy managsimba kaniya. Ang Dios espiritu ug ang mga magasimba kaniya kinahanglan managsimba kaniya diha sa espiritu ug sa kamatuoran.” Tin-aw kaayo nga buot sa Dios ang tawo mosimba kaniya tungod kay matod ni Jesus “ang Dios nangita sa tinuod nga managsimba kaniya. Ang pagsimba sa tawo ngadto sa Dios kinahanglan diha sa espiritu ug kamatuoran. Sanglit and Dios

Espiritu kinahanglan simbahon siya diha sa espirituhanong pagsimba, ug tungod kay ang Dios matuod man nga Dios kinahanglan simbahon siya sa tinuod nga pagsimba nga matod ni Jesus diha sa kamatuoran. Ginatan-aw sa Dios ang kasingkasing sa Tawo ug Makita sa Dios kong ang imong pagsimba kaniya tinuod ba? **Isaias 29:13** ang Dios miingon “kining mga tawhana misimba kanako sa ngabil lamang apan layo kanako ang ilang kasingkasing.”

Sama sa usa ka balay nga walay pundasyon, kung walay pagtolonan ingon nga patukoranan, buyang ang usa ka magtutuo kung wala kini sa iyang kinabuhi.

Ang Pagka-importante sa Pagtolon-an

Ni Rogelio M. Dao

Niini nga artikulo, akong ipahat kaninyo kung ngano nga importante ang hustong doktrina o pagtolon-an, nga subay sa biblikanhon sumbanan tungod kay istrikto ang Dios nga maoy tinubdan. Sa **Pinadayag 22:19** nagaingon nga dili pagadugangan ug pagakuhaan ang pulong

sa Dios aron dili mosangpot sa kahimtang nga pagapanilngan ka sa Dios **Deut. 18:18-19**. Importante kaayo ang pagtolon-an sanglit mao kini ang patukoranan sa imong pagpangalagad. Si San Pablo miingon kang Timoteo nga hatagan niya’g pagtagad ang iyang kaugalingon ug ang iyang pagpanudlo (Pagtolon-an) kay sa pagbuhat

niya sa ingon pagaluwason niya ang iyang kaugalingon ug kad-tong nagapanimati kaniya **I Timoteo 4:16**. Ang pagtolon-an importante gayod tungod kay pinasikad niini makabaton ug kalig-on ang nagtudlo lakip na ang gitudloan. Kon ang pagtolon-an dili husto ang pagkinabuhi malagmit dili usab mahusto. *Padayonan sa sunod.*

Kabatan-onan Alang sa Dios



Matod sa atong nasudnong bayani “ang kabatan-onan paglaum sa nasud.” Tinuod pa ba kini?

Ang mga kabataan maoy kusog sa comunidad ug bisan pa sa tibuk nasud. Ang Iglesia nagkinahanglan ug mga kabatan-onan nga maoy kusog sa Iglesia ug sa mga kalihokan niini. Si San Pablo midasig kang Timoteo kung unsay angayan niyang buhaton ingon nga usa

ka batan-on? Ang **I Timoteo 4:12-13**. “Ayaw itugot nga adunay magatamay kanimo tungod sa imong kabatan-on; hinonoa alang sa mga magtotoo, pagkinabuhi ingon nga panig-ingnan sa sinultihan, ug sa paggawi, sa gugma, sa pagtoo, sa kaputli. Kugihing pagbasa sa kasulatan

ngadto sa kapunongan, ug ang pagmaymay, ug ang pagpanudlo, hangtod sa akong pag-anha diha.”

Nindot paminawon kon masunod sa mga kabatan-onan ang gitudlo ni San Pablo kang Timoteo kong unsang lakang ang subayon sa mga batan-on.

Tinuod ba nga aduna kita'y litiral nga balay sa langit? (Unang serye)

Sa daghang mga katuigan kining maong mga bersekulo sa balaang kasulatan sagad kanunay gamiton sa daghang mga magwawali mga magtutudlo aron pagdasig sa mga maluyahong magtotoo O dili ba kaha mga namatyan nga pamilya. Sagad atong madunggan niini ang linya nga nagaingon, “*sa atong unyang pag-adto sa langit toa nay nindot nga pinoy-anan nga giandam ni Kristo kanato*”. Tinuod ba nga adunay litiral nga balay, mansyon o pinoy-anan ang giandam ni Kristo alang kanato sa langit? Tan-awon kuno nato ang gisulti

Ang balay nga gihisgutan dili litiral kon dili usa ka ginaray nga sinultihan lamang nga maoy kasagaran nga nahitabo sa ubang bahin sa kasulatan. Busa ang **Juan 14:1-2** nga nag-ingon, “Kinahanglan dili magkaguol ang inyong kasingkasing. Sumalig kamo sa Dios, ug sumalig usab kamo kanako. Sa balay sa akong Amahan anaay daghang puy-anan, kon dili pa, moingon ba unta ako

sa pulong sa Dios! **II Korinto 5:1-4,6**.

“Kay kita nasayud nga kon matun-as kining atong yutanong payag, didto sa langit aduna kitay balay gikan sa Dios, usa ka puloy-anan nga dili binuhat sa mga kamot ug walay pagkatapus. Sa pagkatinuod dinhi niining maong payag kita nagapanghupaw sa atong pagpangandoy nga unta kasapawan na kita nianang atong langitnong puloy-anan, aron nga sa kahal-upan na kita niini, kita dili na makaplagaan nga mga hubo. Kay samtang ania pa gihapon kita sa sulod niining

kaninyo nga moadto ako aron pag-andam ug luna alang kaninyo?” Busa sa **II Korinto 5:1-4,6**, atong nakita nga ang mga pulong balay, payag ug pinoy-anan mga ginaray lamang nga sinultihan ug kini nagkahulogan ug langitnong lawas oh mga lawas sa mga magtotoo nga maoy ipuli sa may kamatayon nato nga lawas.

I Korinto 15:51-53, “Ania karon, isulti ko kaninyo ang

maong payag, kita dinat-ugan sa mga lowan, nagaagulo dili tungod kay buot kitang mahukasan niini kon dili aron kita masapawan unta niadtong langitnong puloy-anan, aron ang may kamatayon pagalamyon sa kinabuhi. Busa sa kanunay kita masaligon, kita nasayud nga samtang ania pa kita sa lawas, kita wala didto sa Ginoo”.

Unsa diay buot ipasabot sa pulong “puloy-anan? O Payag? Litiral ba? Dili! **sa bersekulo 6** ang buot ipasabot sa maong mga pulong usa ra, kana mao kining atong lawas nga may kamatayon.

usa ka tinago. Dili kitang tanan mangamatay! Apan kitang tanan mangausab, sa kalit sa usa ka pamilok, inigtingog sa katapusang trumpeta, kay ang trumpeta pagapatunggon, ug ang mga patay pagabanhawon nga may lawas nga dili na madunot, ug kita mangausab. Kay kining lawas nga madunot ra pagailisan unyag dili na madunot, ug kining lawas nga mamatay ra pagailisan unyag



Pagkaanindot kaha kung kining may kamatayon nato nga lawas mailisan na sa langitnong kawas?

Alang sa dugang katin-awan sa gihisgutang mainit nga tapico mahimo kang mosulat kanamo ug mangutana bahin sa mga butang nga nakapalibog kanimo.

Lisod nga Bersekulo, hataga'g katin-awan

“Sa wala pa si Abraham mao na ako.” **Juan 8:58**. Kini nga pahayag ni Ginoong Jesus hangtod karon gituohan nga litiral ug nga si Jesus naglungtad nang daan sa wala pa si Abraham. Sa **bersekulo 56** si Jesus miingon sa mga Judio nga ang inyong Amahan nga si Abraham nali-

pay sa pagsud-ong sa akong adlaw o panahon. Ang pangutana asa niya gisud-ong? Sa buhi pa si Abraham nakahibalo na siya nga muabot ang misiyas ug ang iyang kasingkasing naghandum na sa kaanindot sa adlaw nga anaa na ang Misiyas. Si Jesus gipanagna nang daan sa

Genesis 3:15 nga binhi sa babaye ug ang binhi nagkahulogan sa pagkahimugso. Ang Misiyas nag-una nang daan sa kasingkasing sa Dios sa wala pa si Abraham ug busa si Jesus nag-una kang Abraham sa kahimutang ug dili sa adlaw sa pagkahimugso o pagkatawo.



Ang tawong maalamon maminaw sa mga panambagon.

Spirit & Truth Fellowship of Asia, Inc.

Ang atong Buhatan Makita niining
address:
Blk.17, Lot 22, Amarillo St., Dacoville
Subd. Dumoy, Davao City.

Phone: 082-291-1073
Fax: Not available
Email: davao_ces@hotmail.com

www.stfonline.org
www.truthorthradition.com
www.biblicalunitarian.com

*Spirit & Truth Fellowship of
Asia, Inc.*
S.E.C Reg. No. CN200726777



**Susiha ang among
website sa ibabaw**

**Ang SPIRIT AND TRUTH FELLOWSHIP
OF ASIA, INC.** narebistro niadtong Marso 23, 2007 sa
Securities and Exchange Commission sa Pilipinas. Nag-
sugod kini ingon nga Para-Church sa ngalan nga Christian
Educational Services, Inc. niadtong 1996 dinhi sa Ciudad
sa Davao ug mikanat sa tibuok kapoloan sa Pilipinas. Hu-
man sa tigum sa mga Board of Elders niadtong tuig 2006,
nauyonan nga Bag-obon ang ngalan sa Christian Educa-
tional Services, Inc. ngadto sa SPIRIT AND TRUTH
FELLOWSHIP OF ASIA, INC. Tumong niining
maong buluhaton mao ang pagpalapnag sa Pulong sa Dios.
Pinaagi sa pagtukod ug mga panagtigum sa mga kaigsoonan
nga sama'g pagtoo sa tibuok Habagatang Mindanao kon
dili man sa tibuok kapopod-an sa Pilipinas.



*Aduna ka ba'y ipahibalo sa
mga kaigsoonan? Ipadangat
kanamo ug hatagan ka
namo sa higayon ug dapit
dinhi nga newsletter.*

MGA PAHIBALO SA MGA KAIGLISYAHAN SA SOUTHERN MINDANAO

Sa nanglabay nga mga katuigan ang leadership conference kanunay ginahimo aron nga ang mga lideres o mga pangulo sa kaiglesiyahan magkakita nawong sa nawong ug magkahimamat. Kini tinuig nga buluhaton sa Spirit and Truth Fellowship of Asia ug ang resulta niini nakapadasig sa tanang mga lideres sa tibuok Pilipinas. Niadtong tuig 2007 didto sa Cebu City gihimo ang maong confernsya sa mga lideres ug kapin gatus ka mga kaigsoonan ang mitambong ug dili maasoy ang kalipay sa mga lider nga mitambong niadtong panahona. Apan subo nga palandongon nga karong tuiga

2008 ang maong tinuig nga kalihokan sa mga lideres sa STFA sa tibuok Pilipinas dili una mahinayon tungon sa Pinansyal nga problema. Kini nga problema dili lang sa STFA nga problema, kon dili nahimo kin-ing problema sa tibuok kalibutan bisan pa ang dagko ug adunahan nga mga nasud sa Europa ug America. Si Brother Dan Gallagher sa iyang sulat kanako niadtong milabay nga bulan sa Septiembre mipahibalo nga tungod sa pagkahugno sa Panalapi sa ilang nasud ang mga kontribusyon sa mga kaigsoonan apektado usab, ug busa mihangyo siya nga dili una

karong tuiga mahinayon ang naandan nga konferensya sa mga lideres sa STFA tungod sa rason nga gihisgutan sa ibabaw. Alang sa mga kaigsoonan sa Southern Mindanao kami nangandam na gayod ug gain kini amo nang gi-meetingan niadtong bulan sa Julio uban sa lideres sa kasimbahan sa Cebulan ug Davao sanglit kami man ang mag host unta sa maong konferensya. Apan nunot sa economikanhong problema nga nasinati sa tibuok kalibutan karon among panghinaut ug mga pag-ampo nga sa sunod tuig ang Dios magabubo sa iyang panalangin.